

21 DEO OPTIMO MAX.

UNI ET TRINO,
VIRGINI DEI - PARÆ, ET S. LUCE
Orthodoxorum Medicorum Patrono.

QUÆSTIO MEDICA,*

CARDINALITIIS DISPUTATIONIBUS
manè disceptanda, in Scholis Medicorum, die Martis vigesima-quintâ,
mensis Martii, anno Domini M. DCC. LV.

M. CLAUDIO - CAROLO DE JEAN,
Doctore Medico, Præside.

An Prolem lactare Matribus saluberrimum?

I.



EMINA non tam sibi, quàm procreandis educandisque liberis nata. Vix dùm bis-septem complevit annos, hanc mox fore viro maturam prænuntiant mammæ fororiantes, lumborum gravitas, dolor coxendicum, spontanea artuum lassitudo, ciborum fastidium. Hæc symptomata brevi fugat manans ex utero sanguis, puellamque toro prorsus habilem efficit. Menstruâ quâque periodo pari stipatus commitatu, effluit redundans humor sanguineus, donec utero gerat mulier; tunc ut plurimum cessant Menstrua, humorem superfluum matrique inutilem in sui nutrimentum absumente factu. At parum esset naturam non nato infanti providisse, nisi & adhuc à matre recentis mollitudini accommodatum parasset pabulum. Illud est mammarum munus. Ut primùm è carcere materno in auras prodit tenellus homuncio, protinùs non jam distenta ampliùs uteri fornix constringi, vasa ipsum alluentia ad nativam redire diametrum, contenti humores, hinc Lochiorum nomine foras emitti, illinc retrò conversi vicina latè loca distendere, turgescere uberiori sanguinis copiâ arteriæ Epigastricæ, appellenti per sibi copulatas Mammularum internarum ramificationes sanguini fortius resistere, ille per ramos ipsimet mammarum substantiæ prospicientes ferri copiosius, illos ampliare; mammæ hinc dolere & intumescere, hinc lacteus humor à sanguine separari, primis à partu diebus dilutior, spissior deinceps evasurus, cum sensim sine sensu laxatâ mammarum compage, spasmus & dolor remiserint, amplioresque caseosis & butyrosi partibus patebunt viæ. Lac tali secretum artificio quantum puerulo conveniens est alimentum, tantùm matri omnino est inutile, quin etiam ejusdem fanitati insensibilium, nisi eadè emulgeatur, quâ fecerintur proportionè. Candidos igitur latices tenero vagitu efflagranti puero surdas ne præbeat aures matrè puerpera, ipsam pudeat, à feris sylvestribus materno in natos amore superari. At si, vel feris ipsi feriozem, nulla propriæ prolis tangat cura, sibimet ipsi saltem consulat. Ociùs infantulo sugendos denudet lactei roris eburneos fontes, firmiorem indè sibi certò comparaturâ sanitate. Illud enim saluberrimum esse nullius inficias

* M. THEODORO BARON, anno 1741.

A

2
ibit, cujus beneficio, foras amandatur humor materno corpori inutilis, qui tum in vasis excretoriis commorando, tum ad massam sanguineam revertendo, morbis curatu difficillimis daret occasionem.

I I.

EA est humani corporis structura, ut necessitate quâdam mechanicâ, varii è sanguinis sinu secernantur humores. Illorum ad servandam valetudinem maxima utilitas. Si quâcunque de causâ debitis in locis separari cessaverint, numerosa statim præstò est ægritudinum cohors. Num crethismo laborat glandulosa renum substantia? haud mora muriatico humore inquinatus sanguis totum genus membranaceum salitudine suâ pungit, vellicat, inordinatos trahit in motus, urinam redolentia æger vomitu rejicit, delirat, convulsionibus univèrsum quatitur corpus, mors tandem succedit miserrima, nisi artis beneficentissimæ auxilio, urinæ per renum colatoria restituatur secretio. Num obstructis quoquo modo, tendentibus ad hepar venæ portarum ramificationibus, bilis impeditur separatio? æger fastidit cibos, ingesta malè concoquit, Alvus siccescit, os amarescit, lotium croceo colore infectum redditur, Erysipelate, aut etiam Phlegmone fœdatur cutis. Adeo massæ sanguinæ permixtos remanere varios humores periculosum! nec minora sanitati imminet damna, ubi ex aliorum consortio extricatus humor quilibet (negato exitu) propriis hæret in conceptaculis, vel indè à vasis lymphaticis exsurgit ad sanguinem deferendus. Quoties ab intempestivâ perspirationis insensibilis suppressione, sævissimis Rheumatismi doloribus, torquentur membra, atrocissimis Podagræ cruciatibus divexantur articuli? Quot ab eadem causâ repetendæ Pleuritides, Peripneumoniæ, Diarrhææ, febres catarrhales, Anginæ, Ophthalmiæ? Quot ægros tumulavit latex urinosus, in corpore retentus aut à vesicæ Paralyfi, aut ab ejusdem sphincteris contractione spasmodicâ, vel etiam à calculo ureteris viam claudente? Quantas sæpè parit tragedias, in jecore secreta bilis, liberum per ductus hepaticos iter non inveniens? Quin & ipsarum secum in intestinis remora gravissimos nunnuquam efficit morbos, hæmorrhagias, vertigines, hemicranias, dolores colicos, passionem iliacam. Numquid non à suppressis mensibus funestissima pullulant aliquando quæ mulieres adoriuntur mala, hæmoptysis, vomitus cruentus, hysterica passio, comatosi affectus, convulsiones, cordis palpitatio? numquid impeditus in puerperis Lochiorum fluxus, Apoplexias quandòque non producit lethiferas, crudelia ventris tormina, immanes Cardialgias, uteri inflammationem, aliaque horrenda generis ejusdem symptomata. Quisquis igitur tranquillos absque dolore soles condere expetit, institutam à naturâ variis in organis humorum separationem ferari non sinat: hanc convenienti sex rerum non naturalium usu promoveat; grande credat piaculum, secreti cujuscunque humoris ab organo secretorio effluxum omni operâ non adjuvasse, illudque habeat tanquam causa plurium morborum frequentissima; quos præcavere longè facilius est quàm expugnare.

I I I.

QUE MADMODUM à secundo ad septimum usque circiter ætatis septenarium, mensium fluxu carere tutò nequit femina non prægnans, ita & matrem impunè ab infantum nutritione discedere difficillimum est. Eadem lactis quæ Catameniorum materia, quæ lactant mulieres per uterum non repurgantur, id saltem rarò contingit. Uterque humor in corpore muliebri superfluous. Illius egestio ab uteri peculiari fabricâ pendet, alterius ab infantis suctu perficitur. Quot & quantos matri impendentes avertat morbos ab ejus ubere pendens puerulus, ostendit natura lactis attentius considerata. Triplex lac constituit substantia, aquea, & serum audit; salino-terrea, caseum dicunt; oleosa tandem, quæ butyrum nuncupatur. Quiete diuturniori secedunt ab invicem heterogenea hæc lactis prin-

cupia. In excretoriis mammarum non lactantium tubulis quiescit lac. Quid inde? triplicem resolvitur in substantiam. Oleosa sibi permissa acris fit & rancida, continentia vasa stimulat, erodit; tum vasorum lymphaticorum ope (numerosa in mammis reperiuntur) ad sanguinem reiecta, motuque circulari abrepta, accenditur, æstuat, alios humores exagitat, febres parit inflammatorias. Aquea pars utpote fluidior, massam sanguineam rursus ingreditur, per renes amandanda. quandoque sub feri tenuioris formâ papillis exit. Quid interim de caseosa parte? sero in dies spoliata, crassescit, induratur, in tubulis Galactophoris congeritur, gypseam æmulatur soliditatem, uno verbo in scirrhum degenerat; hinc vicina comprimuntur vasa sanguifera, hinc impedita in mammis circulatio, hinc inflammatio, suppuratio, cancer exulceratus letho sæpissimè finiendus. Quò quis humor à sanguine separandus, circulationi minùs idoneis & crassioribus constat partibus, eò intra sanguinis massam hunc retineri periculosum magis. Talem esse lactis indolem perse patens est. Quantis itaque ægritudinibus non lactantes feminas plecti necessum est? præterquàm quòd superfluo ac inutili humore non liberantur, sicque ipsis metuendi sunt quotquot à plethora natales ducunt morbi, ille est insuper lactis genius, ut facillimè spissescat & grumos agat; plethoræ igitur adjunget se comitem Cacoehymia. Qualis porò Cacoehymia species? cœnosa & lutulenta humorum Diathesis, fluiditatis inimica. Lacteo humore luxurians sanguis, omnes vitia bit secretiones, hærebit in capillaribus, mille pariet obstructions mox datas progeniem vitiosiores.

I. V.

HACTENUS ratione stabilitam de noxis ab effuso (ut vocant) lacte sententiam, heu frequens nimium! ulterius confirmat experientia. Decumbentes à partu adeamus non lactantes puerperas. Dictu horrendum, quàm multa, quàm crudelia, quàm pertinacia, ipsas undiquè circumveniant incommoda! Modò vultum occupat Erysipelas, indè tumet facies doletque, scintillant oculi, pulsant tempora, lancinans adest capitis dolor, totidem retenti intra molem sanguineam lactei humoris partus infelices. Modò lymphæ lentior facta, hic & illic moras nectit, cumulat in glandulis, tumores, gignit durissimos, Parotides, strumas, scirrhus. Modò impatibiles non lactantium femora distrahunt dolores, ingenisque medentibus faceffunt negotium. Aliàs incarcerationum in matris corpore, recens nati alimentum præ calore expanditur, febresque accendit varii generis, quas inter exanthematicæ omnes, præsertim quæ purpurata dicitur, sive rubra sit Purpura, sive alba, magnopere pertimescendæ. Clinicis notissimum est lacteum succum passim per viscera & artus vagantem, abscessus aliquandò generare periculosissimos non nisi ferro debellandos, quibus in speciem sanatis, alii non deficiunt pari arte oppugnandi, sæpiusque cum pari successu. Nonnumquàm ab ingrata matre pœnas reposcit pleuritis gravissima illamve exhausta fluens alvus, confodit penè, atrox intestinorum inflammatio, molesta angit suffocatio. Quandoque ipsius lactis afficiuntur receptacula, quibusque deliquit, in iisdem potissimum partibus multatur parens inhumana, mammas varii infestant tumores, ulcera deturpant, cancri exedunt. Est & ubi in mali partem trahitur uterus, taboque & sanie diffuit humani generis officina. Hæ sunt quas secum Galliis intulit pestes, prolem non lactandi mos pessimus. Tot procellis jactatam non vivunt vitam illarum regionum mulieres, apud quas naturam sequendi ducem maxima religio, vetat infantes conductitiis mammis alendos tradere.

V.

ATTAMEN, inquires, multæ sunt non lactantes feminæ quæ optimâ fruuntur valetudine. Quid ad nos? si partu frequentissimo fatiscant tandem illarum vires, solidorumque frangatur Elater, undè proles numerosa quidem sed debilis,

2

4

utpotè infirmo in corpore generata. Hæc vitant incommoda quæ prolem nutriunt matres. Ita enim est statutum à naturâ, ut Veneris præmia rarissime ferant nutrices. Uterum agro non ineptè comparaveris non secus ac agri interpositâ quiete non reparati, efficiunt, raramque emittunt segetem, uterus pariter non intermisso partu exhaustus, concreditum sibi, malè educat hominis germen, Quandiu lactat mulier, amissum uterus recuperat tonum novaque accipit vires, ut pulchrâ sanâque prole rursus beet parentes. Procul hinc malefana quorundam consilia, qui se-xui (haud dubiè colendissimo) ipsam crudeliter enecant. Quid molestius inquit quàm clamores inter & ejulatus infantis, vitam trahere? Quid tædiosum magis quàm puerulum ulnis continenter gestare, ipsiusque ad ora papillas identidem admovere. Egregia profecto difficultas! Quasi verò huic quoque rei maximè subventum non esset à naturâ, Hæc quippe tantam maternis animis in-natos caritatem iniecit, ut quicquid prolis causâ suscepere, nedum cum tædio & molestiâ, quin etiam incredibili cum gaudio illud aggrediantur: imò visæ sunt primiparæ quas ex avulsâ prole, alienis uberibus nutriendâ mæror extulit inconsolabilis. Sed dicant vicissim, num satiùs est torqueri morbis periculosissimis? Num gravia sunt minùs gestationis incommoda, cibi fastidium, Pica, Malacia, absurdorum appetitus, Cardialgia, Nausea, Vomitus, Stranguria, Dysuria, Tenesmus, Hæmorrhoides, crurum inflatio & indè subsequens difficilis progressio? Verùm in-surgunt alii, adsunt rationes quibus præcaveantur noxæ ab effuso lacte oriundæ, aut etiam ejusdem impediatur effusio. Felicem utinam sortirentur effectum tot adhiberi solitæ in non lactantium morbis, evacuationes omnis generis. Præterea nonne insipientis est morbum etiam curatu facillimum consultò admisisse, qui facil-issimo declinari poterat negotio? Ergo canibus ultrò offerent mammas mulieres, quas infantibus denegarunt? talia meminisse horret animus. Urges adhuc, debilioris sunt temperamenti urbanæ matres, quàm ut illasâ sanitate tantam perferre valeant evacuationem, quantam solent experiri lactantes; compertum enim est experien-tiâ nutrices quassdam duas lactis libras quotidie emittere. Apage erroneam opinio-nem, debilitas illa non aliundè provenit, quàm ex eo quòd materna non fuxerunt ubera, sed & ipsi optimè moderetur infantum nutritio; hujus enim ope foras emittitur humor qui mole suâ gravaret partes, huic oneri ferendo præ suâ molli-tie impares; & id adeo verum est, ut inter feminas non lactantes, illæ graviùs ægrotent quæ vitreâ, ut ita dicam, donantur valetudine, Malâ igitur non am-pliùs utantur matres consuetudine, eoque majora sibi ex prolis lactatu spondeant emolumenta, quod dùm eas nutriendi infantes cura tenet, nec mensis opiparis accumbendi, nec in seram noctem cœnas protrahendi tempus superest, sicque permultas morborum effugient occasiones. Quid plura? Concludamus.

Ergo Prolem lactare Matribus saluberrimum.

Proponebat Parisiis JOANNES - BAPTISTA - FRANCISCUS
DELARIVIERE, Parisinus, Saluberrimæ Facultatis Medicinæ
Parisiensis Baccalaureus, A. R. S. H. 1755.

A SEXTA. AD MERIDIEM,

Typis Viduæ QUILLAU, Universitatis & Facultatis Medicinæ Typographj, 1755.